

10 pantai di Pahang alami hakisan serius

Oleh [Asrol Awang](#) - Januari 29, 2021 @ 12:17pm

bhnews@bh.com.my



Pantai Sepat, Kuantan antara 10 lokasi di seluruh Pahang mengalami hakisan yang serius. -
Foto Asrol Awang

KUANTAN: Sebanyak 10 pantai di Pahang dikesan mengalami hakisan pantai yang serius ketika musim tengkujuh yang melanda negeri itu, baru-baru ini.

Lokasi pantai itu ialah di Cherating, Balok, Teluk Chempedak, Kempadang, Sepat dan Cherok Paloh di daerah Kuantan, Tanjung Batu, Pekan, Kuala Rompin dan Tanjung Gemok di Rompin serta Kampung Mukut di Pulau Tioman.

Pengerusi Jawatankuasa Pelancongan, Kebudayaan, Alam Sekitar, Perladangan dan Komoditi Pahang, Datuk Seri Mohd Sharkar Shamsudin, berkata hakisan itu akan menjadi semakin serius jika langkah menanganinya tidak dilakukan sekarang.

Katanya, kesannya bukan sahaja kepada aktiviti pelancongan, malah turut menjelaskan ekonomi penduduk di persisiran pantai terbabit.

"Dalam keadaan ini, kerajaan negeri memandang serius dan akan mengambil langkah sewajarnya untuk mengatasi masalah yang dihadapi.

"Antara langkah awal ialah membina struktur kawalan hakisan pantai atau 'rock revetment' dengan meletakkan batu di kawasan pantai yang terjejas.

"Langkah itu untuk memastikan ombak besar terutama ketika musim tengkujuh tidak menjelaskan persisiran pantai daripada terus terhakis," katanya ketika dihubungi, hari ini.

Mohd Sharkar berkata, peruntukan RM10 juta diperlukan untuk kos membina struktur itu sepanjang satu kilometer.

Katanya, masalah hakisan pantai itu akan dimaklumkan ke Majlis Mesyuarat Kerajaan Negeri untuk tindakan selanjutnya.

"Kita harap masalah hakisan pantai ini dapat diatasi segera untuk kepentingan bersama," katanya.